

SAMÞYKKT**fyrir Vatnsveitufélag Eiðahverfis í Eiðahreppi.****1. gr.**

Félagið heitir Vatnsveitufélag Eiðahverfis. Heimili þess og varnarþing er í Eiðahreppi í Suður-Múlasýslu.

2. gr.

Tilgangur félagsins er að sjá Eiðhverfinu fyrir neyzluvatni.

3. gr.

Stofnendur félagsins eru Alþýðuskólinn að Eiðum, Barnaskólinn að Eiðum, Endurvarpsstöðin að Eiðum, Þórarinn Sveinsson og Björn Magnússon vegna eigin íbúðarhúsa, sóknarprestur, vegna prestseturshúss og skólastjóri Eiðaskóla vegna Eiðabúsins og íbúðarhúss á Garði.

Kostnaður og eignarhluti einstakra aðila vatnsveitunnar miðast við áætlaða neyzluþörf, þannig: Ein eining reiknast hvert heimili, hverjir 7 nemendur, hverjir 7 starfsmenn, einstakir, hverjir 14 nautgripir. Samkvæmt því reiknast þátttökueiningar Alþýðuskólans, skólans vegna, Eiðabús og íbúðarhúss á Garði samtals 27, Barnaskólans 6, Endurvarpsstöðvarinnar 2, prestseturs 1, Þórarins Sveinssonar 2, Björns Magnússonar 1, eða alls 39 einingar.

Hver stofnandi greiðir tvö þúsund krónur sem stofngjald fyrir hverja einingu kostnaðar og eignarhluta í vatnsveitunni og telst hann ekki fullgildur félagsmaður fyrr en stofngjaldið er greitt.

4. gr.

Félagið sér um byggingu mannvirkja við vatnsból og lagningu vatnsveitu í dreifipunkt við endurvarpsstöð. Hver einstakur félagsmaður annast á sinn kostnað vatnslögn frá dreifipunkti á neyzlustað.

5. gr.

Eigendur væntanlegra nýrra húsa á félagssvæðinu má taka í félagið með samþykki lögsmáts aðalfundar. Nýr félagsmaður greiðir sama stofngjald og eldri félagar og öll gjöld, sem á félaginu hvíla, til jafns við aðra félagsmenn frá því er hann gekk í félagið. Sjálfur skal hann kosta allar framkvæmdir, sem gera verður sérstaklega hans vegna til þess að hann geti notað mannvirki félagsins.

6. gr.

Stofnkostnað af mannvirkjum vatnsveitunnar skal að jöfnum hlutum greiða fyrir hverja einingu samkv. 3. gr. Skal hann greiddur með stofngjöldum félagsmanna þar sem þau hrökkva til og styrk, sem veittur kynni að verða til vatnsveitunnar.

Vatnsskatt skal innheimta árlega af hverjum félagsaðila í hlutfalli við eign hans í vatnsveitunni. Skal félagsstjórnin tiltaka upphæð hans þannig fyrir hvert reikningsár, að nægi til greiðslu vaxta og afborgana stofnkostnaðar mannvirkja veitunnar, reksturs og viðhalds.

Gjöld samkv. 2. mgr. þessarar greinar má taka lögtaki ásamt áföllnum innheimtukostnaði, ef ekki er staðið í skilum um greiðslu gjalda til félagsins. Eignir félagsins standa til fullnægingar skuldbindingum þess. Enginn félagsmaður ber ábyrgð á skuldbindingum félagsins umfram gjöld þau, sem honum er gert að greiða til félagsins samkv. ákvæðum þessarar samþykktar.

7. gr.

Félagsfundur er lögmætur, ef helmingur félagsmanna sækir hann, enda hafi verið löglega til hans boðað. Fundur er löglega boðaður, ef hverjum félagsmanni er tilkynnt fundarboðið sannanlega með fimm daga fyrirvara. Á félagsfundi hafa allir félagsmenn jafnan rétt og afl atkvæða ræður úrslitum. Ákvarðanir, sem hafa í för með sér kostnað fyrir félagið umfram eðlilegan reksturskostnað þurfa þó að hafa að baki sér meiri hluta félagseininga samkv. 3. gr. til að teljast samþykktar. Skylt er félagsstjórn að boða til félagsfundar ef þrír félagar eða tveir stjórnarmeðlimir krefjast þess, enda greini þeir tilefni kröfunnar.

8. gr.

Aðalfundur félagsins skal haldinn eigi síðar en 1. apríl ár hvert. Til hans skal boða með viku fyrirvara, bréflega eða persónulega. Aðalfundur er lögmætur ef $\frac{3}{4}$ félagsmanna sækja hann. Hafi þrisvar sinnum verið boðað til aðalfundar vegna ónógrar fundarsóknar, telst þriðji fundurinn lögmætur, hver sem fundarsókn hans er. Á aðalfundi skulu teknar ákvarðanir um starfsemi félagsins, lagðir fram endurskoðaðir reikningar þess og kosnir þrír menn í stjórn félagsins og tveir endurskoðendur til eins árs í senn.

Liggi önnur mál fyrir aðalfundi en venjuleg aðalfundarstörf, skal þess getið í fundarboði.

9. gr.

Stjórn félagsins skiptir sjálf með sér verkum. Störf stjórnar og endurskoðenda skulu vera ólaunuð. Formaður kveður stjórnina saman til fundar og boðar félagsfundi og aðalfundi. Stjórnarfundir eru því aðeins lögmætir, að allir stjórnarmenn séu mættir.

Færa skal gerðabók stjórnarfunda og skal ritari stjórnarinnar lesa fundargerð í lok hvers fundar og undirrita hana ásamt formanni, þegar hún hefur verið samþykkt.

10. gr.

Stjórn félagsins hefur umsjón með vatnsveitunni, annast reikningshald hennar og innheimtu á gjöldum til félagsins. Hún sér um viðhald og viðgerðir á vatnsbóli og aðalleiðslu. Viðhald heimæða og umbúnað í húsum annast hver félagsmaður hjá sér.

11. gr.

Samþykkt þessari má ekki breyta nema á aðalfundi, enda hafi fyrirhugaðra breytinga verið getið í fundarboði og séu að minnsta kosti $\frac{2}{3}$ félagsmanna samþykkir þeim.

Samþykkt þessi, sem samin er og samþykkt af Vatnsveitufélagi Eiðahverfis í Eiðahreppi staðfestist hér með samkvæmt vatnalögum nr. 15 20. júní 1923 til þess að öðlast gildi þegar í stað og birtist til eftirbreytni öllum þeim, sem hlut eiga að máli.

Félagsmálaráðuneytið, 29. nóvember 1963.

F. h. r.

Hjálmar Vilhjálmsson.

Hallgrímur Dalberg.